

佛爲阿支羅迦葉自化作苦經

失 譯 人 名

如是我聞一時佛住王舍城耆闍崛山爾時
世尊晨朝著衣持鉢出耆闍崛山入王舍城
乞食時有阿支羅迦葉爲營小事出王舍城

敬九

十二

向耆闍崛山遙見世尊見已詣佛所白佛言
瞿曇欲有所問寧有閑暇見答與不佛告迦
葉今非論時我今入城乞食來還則是其時
當爲汝說第二亦如是說第三復問瞿曇何
爲我作留難瞿曇云何有異我今欲有所問
爲我解說佛告阿支羅迦葉隨汝所問阿支
羅迦葉白佛言云何瞿曇苦自作耶佛告迦
葉苦自作此是無記迦葉復問云何瞿曇
苦他作耶佛告迦葉苦他作者此亦無記迦
葉復問苦自他作耶佛告迦葉苦自他作此

亦無記迦葉復問云何瞿曇苦非自非他無
因作耶佛告迦葉苦非自非他無因作者此
亦無記迦葉復問瞿曇所問苦自作耶答言
無記他作耶自他作耶非自非他無因作耶
答言無記今無此苦耶佛告迦葉非無此苦
然有此苦迦葉白佛言善哉瞿曇說有此苦
爲我說法令我知苦見苦佛告迦葉若受即
自受者我應說苦自作若他受他即受者是
則他作若受自受受他受復與苦者如是者
自他作我亦不說若不因自他無因而生苦
者我亦不說離此諸邊說其中道如來說法
此有故彼有此起故彼起謂緣無明行乃至
純大苦聚集無明滅則行滅乃至純大苦聚
滅佛說此經已阿支羅迦葉遠塵離垢得法
眼淨時阿支羅迦葉見法得法知法入法度

敬九

十三

諸狐疑不由他知不因他度於正法律心得
無畏合掌白佛言世尊我今已度我從今日
歸依佛歸依法歸依僧盡形壽作優婆塞證
知我阿支羅迦葉聞佛所說歡喜隨喜作禮
而去時阿支羅迦葉辭世尊去不久爲護犢
犍牛所觸殺於命終時諸根清淨顏色鮮白
爾時世尊入城乞食時有衆多比丘亦入王
舍城乞食聞有傳說阿支羅迦葉從世尊聞
法辭去不久爲牛所觸殺於命終時諸根清
淨顏色鮮白諸比丘乞食已還出舉衣鉢洗
足詣世尊所稽首禮足退坐一面白佛言世
尊我今晨朝衆多比丘入城乞食聞阿支羅
迦葉從世尊聞法律辭去不久爲護犢牛所
觸殺於命終時諸根清淨顏色鮮白世尊彼
生何趣何處受生彼何所得佛告諸比丘彼

已見法知法次法不受於法已般涅槃汝等
當往供養其身爾時世尊爲阿支羅迦葉受
第一記

佛爲阿支羅迦葉自化作苦經